

ALL NATIONS GOSPEL PUBLISHERS



www.angp-hb.co.za



info@angp.co.za

ESHIMBA DIA MUNTU

*Eshimba dia muntu nshibo ipatulwe i kishila y'Efile Mukulu.
Sunga mbu kitanda kia busendwe kia Satan. 1 Yoano 3:4-10.*

Kwi bakwete kubadika:

Dino ebuku ta ndjipia. Kasha dibamwekiele takudi bipwa nkama ibidi, 200 dibamwekiele kwibedi mu nsenga ya Bena France, (Fwalase) Biabia dino ebuku dibafisha etata na mwabi ukata kwi bantu bebungi. Dinyi dino ebuku ndjilombena'nka bu lumweno lw'eshimba lwatukwete kwibandjila atwe banabene, na kwiuka mwikelo we'shimba dietu bu bidiukie Efile Mukulu Namene. Kwi bantu bebungi abapu kwiuka bubi bwabo bwi munda pa mwanda wa kubadika mu dino ebuku, abo abapu kwilanga mu mashimba'bo na kutambul'eshimba dipia na kikudi kipia munda mwabo.

Biabia obe namu pakubadika dino ebuku, otentekiesh'eshi: Nyi mbi-nyibinyi ebuku dino nyi ndumweno lw'eshimba lwa kwibandjila obe namene. Biabia su twemwiukie Efile Mukulu, su we mwina-Kidistu, su we mukumine, su we mwalukie ku nyima, okauku biakumona kifwatulo kiobe anka bu biakimweka kwi'File Mukulu namene; na winyi Efile Mukulu te na muntu'shi, au ngiu, au nyi ngiu, ooo, anka Efile Mukulu atala mashimba a bantu. Euku bioso bi mwanka.

Biabia Kafilefile namu nyi nshya-madimi oso, e nyi nfumu a mufito, na bwifile a pa nsenga, asepela kwialula bu mwikeilu etata, ank'e ta mwikeilu etata, ooo, bantu bebungi pakuleshibwa mwikelo wa bubi bwe abafitshi munda bikabe. Binyibiabia bu biabibadi bikale mu mafuku a kala mpaa na lelo bi'anika pamune, batumitwa ba madimi bebungi be kwanka na bafubi ba kudimbana, bakwete kwialula bu batumitwa ba Kidistu. Sunga mbiabia ta kwi mwanda wa kukanya mwanda Satana namene bealulwile bu mwikeilu etata. *2 Kodinda 11:13-14*: Basodi ba mianda na bashi-bakumine, abo babadi bampofu, bafwe ku meso e Efile Mukulu. Abo abakokiele Kikudi ki'Efile a pano pa nsenga. *Efisesa 2:2*. Biabia su tabeuku kupatula bu biabadi bampofu abakalwila ikala-ika. Yawa akula'shi: ntshi na milwiso, edimbi namene. *1 Yoano 1:8*.

Biabia yawa kwete kukita bubi, nga Kafilefile, mwanda Kafilefile alwisha mpaa na ku mbangilo. Nyi pa uno mwanda ubasokokiele Mwan'Efile mwadi'akulwishisha mifubo ya Kafilefile. *1 Yoano 3:8*. Biabia nwibofushe anwe banabene kwi'File Mukulu, Nukambile Kafilefile n'e akenusuku. Nwifubulei kwi'File Mukulu n'E akefubula kwa nudi: *Yakoba 4:7, 8*.

Penyipapa obe pa kubadika mu dino ebuku na kubandjila bifwatulo bi mudi, biabia obangie kwitala munda mobe. Bibuwa okumine etata di'Efile Mukulu dikuleshe mwikele eshimba diobe, totunanga, mwanda ebuku di'Efile adiakula'shi: Su atwakula'shi, tatwi na bubi atwidimbi'twe banabene, na biabinyibinyi tabi munda mwetu. Anka su atusokola kusola kwetu biabia E nga kishima na kululama kwa kwitulekiela bubi bwetu, na kwitutosha ku ikondame yoso. *I Yoano 1:1-10*. Binyibiabia twipopeleshei mushi mw'eyasa dikata di'Efile Mukulu, biabia mase a Yesu Mwan'E etutosha ku bubi boso. *I Petelo 5:6; I Yoano 1:7*.

Nwibamunane mu bufumu bwa Satana sunga bw'Efile Mukulu, biabia we mpika a bubi sunga we mufubi e Efile Mukulu. Biabia su we mukambilwe na bubi bibuwa oitanyine kwi'File Mukulu n'E euku kukumanuna pa Yesu Kidistu abatumine pano pa nsenga kupasha basodi ba mianda, na kutshimuna matalwa a bubi na a Kafilefile pamune. E, Yesu Kidistu nyi Mukudi etu; Biabia obe we mu kibumbu ki'Efile Mukulu Atshinwa, E, amona bifibwe bioso na mitentekiesho yoso i mu mashimba, na bikitshino biobe bioso biokwete kukita mu muwa obe. Tokamono bia kufwama sunga kufia bikitshino biobe kwi'File Mukulu; Yawa bapangile matwi akutwe kwifwakana su? na yawa bapangile meso, akutwe kumona su? *Nono ya 94:9*.

Mwanda meso a Yehova akiesakiesa kufumankasha nsenga yoso koso-koso; mwanda wa kulesha bukome bwe kwi bantu be na mashimba alombane kwadi. *2 Kulondola 16:9*.

Mwanda meso e, e pa mwikelo wa muntu, kwete kumona bikitshino biabo bioso, ta kwi mufito kwi bakitshi ba bubi sunga mutala wa lufu wa badi'akufwama. *Yobo 34:21, 22*.

A nka Yesu tamwikulupile e namwinyi, mwanda badi mwibaukie boso. *Yoano 2:24*.

Mwabi kwi wa muntu shya-bubi bwe bubalekielwa na busodi bwe bwa mianda bubashimangishwa. Mwabi kwi wa shya-bubishi'abulondolwa kwi Yehova, shi na bulamalama munda; *Nono ya 32:1, 2; 51*. Biabia Yesu Nfumu-mwetu aitanyina mpaa na lelo eshi: Fikai kwandji'mi, anwe boso bakutuputa na mufubo, ami nankenupa kikisho; *Mateo 11:28-30*.

KWIFWATULO KIA KWIBEDI.

Binyibiabia kino kifwatulo akileshe eshimba dia muntu mulume sunga mukashi, dia pano pa nsenga dishi dialulukie, aditemunwa mwibuku di'Efile bu "musodi a mianda", kupatula'shi, nyi muntu mukokiele kikudi kia pano pa nsenga, na ndakalaka y'eshimba bu biadimweka ku mpala kw'Efile Mukulu. Banda kutala meso a muntu amonga pyuu; pa mwanda wa kukolwa mafuku oso, bu biatubadika mu *Nkindji 23:29-33*, kwamba'shi, bashya-



ESHIMBA DIA MULWISHI

malwa mbanyi? mbanyi bashya-kwinyongola? bashya-kubwelabwela mba-
 -lyi? bashya-lutotodi mbanyi? bashya-malonda pa mbidi ashi na mwanda
 mbanyi? bashya-meso amonga pyuu mbanyi? Nyi mbaba abashala kita-
 tshisha ku malwa, bakwete kwenda abakimbanga malwa asobakane; Tota-
 langa malofu pa'ki amonga pyuu, paki'amekameka mu kipulu, paki apitu-
 munwa pa mudibu. Anka kunyima asumana bu nyoka, asumana bu nyoka

a nsubu. Meso obe akabandjila bintu bia bene, eshimba diobe adikesamba mianda ibungi itshikame.

Mushi mwa mutwe wa kifwatulo kino, amumweka eshimba dia muntu, namu mwi nyema i bipaso na bipaso, aifunku bubi bwi bipaso bibungi bwi mwishimba dia muntu, mwanda eshimba dinyi nyi nkwasya ya bubi bwetu. Pa uno mwanda Efile Mukulu bakwile eshi: Eshimba ndjikile bintu bioso na ndjindji, di bubi bukalabale, a nanyi euku dianka? *Yelemai 17:9*. Na Nfumwetu Yesu namu bakwile eshi: Mwanda munda mw'eshimba dia bantu amutuku binangu bibubi, na mabasa, na lukiebanokiebano, na bunto-mboshi, na bwifi, na meso atone, na bubi, na kifita, na mudiopolo w'eshimba dibi, na kukana, na kwinemeka, na butesha. Yino mianda ibi yoso aituka munda, ailwisha muntu. *Mako 7:21-23*.

1. NDUBA — Biabia kiatumono mu kifwatulo kwibedi nyi nduba, ank'e apwandjikishwa bu kwinemeka mwishimba dia muntu. Na yawa Mutumbwe a kanya, Mukeluba mushingwe mwimu, winyi badi kala mulami a kalo k'Efile Mukulu, mwikeilu e Efile namene, anka bapone pa mwanda wa kwitatula kwe, nyi pa mwanda uno balulukile tadi mwishikwanyani n'Efile Mukulu, e, nyi NKafilefile. *Isaya 14:9-17: Esekiele 28:12-17*.

Binyibiabia kwinemeka akumweka mu bipaso bibungi. Bamo bantu abenemekiela bupeta bwabo, sunga mu binangu biabo, na mu bifwalwa biabo abiulwa ku mulo ukata, bamo namu abenemekiela pa mwanda wa kutanda, sunga bwana ntandjilo, sunga mu bukome bwabo bwabakitshi mianda ya kukanya. Biabia bano boso mbambwe'shi: Efile Mukulu, etupishena na bakwinemeka, apana bumuntu kwi abepelesha. *I Petelo 5:5*. Dimo Efile Mukulu nyi mushikwe kwinemeka na kapesha. *Nkindji 8:13*. Kwinemeka kwi ku mpala a kututshika, eshimba dia kasabu di ku mpala kwa kupona. *Nkindji 16:18*.

2. MBWA — Biabia mbwa namu etulesha bubi bwa lusandji na mabasa, na ndakalaka ya ku mbidi, mwanda mbwa koso kwende teuku kwishinka, nyi nshya-bwifi, nkindakanyi. Na bantu bebungi beanka biabia, bakwete kwinemeka mu kukita kwa bubi pa kukutwa kwa kulonda bishila bi'Efile Mukulu. Biabia lusandji na mabasa bikwete kutama bikata mu nkatshi (mwenu) mwa bantu mu ano mafuku etu a ku nfulilo kwa pano pa nsenga. Bansongwalume bebungi tabeshinki mu mashimba' bo kalolo, bakwete kukita lusandji koso kwabatambuka, sunga mukashi a muntu, sunga mukashi shi'abandjile kutwela kwi mulume, abebapisha mianda bisumanga kushi kutshina. Sunga bekala na babo bakashi, abebalekie bisumanga, abakakimbi bakashi bapia bakukita n'abo bubi. Biabia bubi bubadi na Bena Sodomu bubakwata mashimba a bantu mu ano mafuku, nyi pa mwanda uno Nfu-

mwetu Yesu bapwandjikishe eshi: Anka bubibadi bikale mu mafuku a Lote nyi mwamukekela mu mafuku a ku nfudilo. *Luka 17:28-30*. Anka binobino mianda ibapu kwaluluka, mwanda bakulu bakala pa kusanana muntu alwisha kibundji na bubu bwe, abamudikile bu mbwa, tababadi abemana kumutapa, kwamba'shi, Tala akanyangisha kibundji na bubu bwe. Biabia ebuku di'Efile Mukulu adiakula'shi: Pasha pe mbwa na bashya-masende, na bashya-lusandji, na bantapani, na balangwidi ba mankishi na boso bashya-madimi. *Kibafumbwilwe 22:15*. Tshinai lusandji, (mwanda) mulwisho oso ausolo muntu ta wi ku mbidi, ooo, anka su ndusandji biabia basolo mpaa na ku mbidi ye yoso. Abiabia tanwibeukie'shi: Mbidi yenu nyi nshibo ipatulwe i kishila ya Kikudi-E-Selelee e munda mwenu anudi bapebwe kwi'File Mukulu su? *I Kod. 6:15-20*.

Su muntu alwisha nshibo ipatulwe i kishila y'Efile Mukulu, biabia Efile Mukulu namu akamulwisha, mwanda nshibo ipatulwe y'Efile Mukulu nanwe. *I Kod. 3:16-18*.

3. NGULUBE — Anka ngulube apatula bubu bwa kukolwa na mudio-polo. Ngulube adiya bioso biamono, sunga mbibuwa sunga mbibubi, bu bangi bantu bakwete kudia nyema aifu masungu na ifwile. na kutoma mase ashidikwe kishila kwi'File Mukulu. *Bikitshino 15:20; Isaya 66:17*. Biabia bantu bebungi bakwete kulwisha mbidi yabo, ku mudiopolo sunga kutoma kwa nfwanka a bipaso bioso, na tubangi. Ku bino bintu bioso abitweshā biko mwishimba na bulembe mu mase, na kufisha muntu ese ebikitshi mwishinda dia bubu. Satana bapu kwibanya bu bapika be, kwi bantu bebungi bamukokiele, anka bukome bwa namene Efile Mukulu nyi abwiuku kupososa mpika a Kafifile, winyi mubile kutoma nfwanka na kukita bioso bibubi. Dimo kwi bansongwalume bebungi na bamo bakulu mpaa na banunu pamune, abatentekiesha'shi: Kutoma malwa sunga nshinyiki sunga malofu, ta mbubi ooo, anka yawa shya-kukolwa teuku kutwela mu bufumu bw'Efile Mukulu. Muntu mukolwe akita mianda ilotakane ya bufu bukata. Malofu nyi'anamene kapesha, bitomwanga bibukopo nyi bishya-kubwelabwela, yawa akatupilwa pa mwanda wabio te na binangu. *Nkind. 20:1*.

Mu bishila bia Mosesa namu amwamba'shi: Ese badi na mwan'e ntomboshi, sunga shya-kukolwa, bamufishanga kwi bakulu, kwamba'shi: Bamwase mabwe, afwe, mwanda wa kukatusha bubu munkatshi mwabo. *Kielekiesho 21:19-21*. Biabia nyi mpamune n'obe kwete kusangakana kuteka bitomwanga bibukopo bopu kusola mwanda wi pamune na benyi abatoma'bio. *Isaya 5:22*.

Aee! mpombo kwi yawa apana kwi mwikungishanyi n'e bitomwanga bibukopo, kwete kumukolesha alombasha bulembe kwadi biabadi'akumona

muswa w'e. *Habakuka 2:15*. Tanwiuku'shi: Bashi balulame tabakapiana bufumu bw'Efile Mukulu su? Tanudimbibwanga, bashya-kukiebanakiebana, sunga balangwidi ba mankishi, sunga bashya-lusandji, sunga bakwilwisha'bo banabene bu bakashi, na bu balume, sunga bangifi, sunga bashya-malaka, sunga BAKODI BA MALWA, sunga bankanyi ba mulomo, sunga banyeñanyi, tabakapiana bufumu bw'Efile Mukulu, ooo, *I Kod. 6:9,10*.

Binyibiabia bikitshino bia mbidi bisokolwe patoka nyi mbino: Masandji, bukiebanekiebane, kushula kwa bishila, mudiopolo w'eshimba dibi, lulanngwilo lwa mankishi, butshi, mushikwa, kwitupishena, mukao, nsungu, mpaka, kwitshibena, kiutu, etombo, KUKOLWA, na kutoma matanga, na ingi i bino; pa ino (yoso) i bino nenudimuna'nka munenudimwinyine kala'shi: abo bakwete kukita yanka tabakatwele mu bufumu bw'Efile Mukulu, ooo. *Ngalatea 5:19-23*; Tanukolwanga nfinyo mwanka nyi mwi bufundakanyi, anka nwikute Kikudi-E-Selelee. *Efisesa 5:18*. Yesu namene nyi nsulo ya muwa. Yesu eshi: Su muntu e na nyota afikie kuno kwande atome mema a muwa. *Yoano 7:37-38*. Anwe boso bashya-nyota su mbanyi su mbanyi fikai ku mema, sunga yawa shi na 'mono, fikai nule, nudie, fikai nule nfinyo na mabele kushi na sunga 'mulo. A mwanda kinyi osumbwila 'mono ku kintu kishi'akidibwa? na mifubo yenu pa kiakia kishi'akikutwa? *Isaya 55:1-2*. Anka ese atomo ku a mema ankamupa takapusha nyota dimo, ooo, sunga mpapelapela, anka a mema ankamupa akekala munda mwe bu nsulo ya mema aifufuka, mpaa na mu muwa autala wa ikala-ika. *Yoano 4:14*.

4. NKOFU. Biabia nkofu nyi nyema atambuka'nka maletemaletete, e bu kipwandjikisho kia bantu bakokiekokie na bashyakudimbana, na bando-shi, Muntu mubofule apona mu kutompibwa kwa bipaso bibungi. E nyi nshya-kifulo kia kwiba, takiebe kufuba. Lukalo lwa shy'epampa alukamwipaisha, mwanda masa e apele kufuba: Efuku dioso kwete'nka kwabila; *Nkind. 21:25-26*. Butuba bw'eshimba tabwi na kiabukitshi, mwanda mutuba tateka (Efile) kalolo, ooo, sunga nkubadika Ebuku di'Efile Mukulu, Biabia su'Efile Mukulu akula kodi'be mwina nsenga'shi: Kumina lelo uno, ndambule'shimba diobe, ank'obe otungu ku mafuku e ku meso, oshi'ouku, biabia okakutwa kufwila mu bubi bobo kushi kupanda mwi Kidistu Nfumwetu su? Lelo youno su bopusha eyi die, tokomeshanga eshimba diobe. *Bahebelu 3:7-8*. Tubande kutala kibolwa kia nkofu, nakio kiabakimbi kwi bañanga bashya-masende, nakio kimune kiabufubu n'akio mu kupaka kwa manga. Biabia kikwete kwitulesha bubi bwa kupaka kwa manga, na bwa-kwiakulupila mu kubuka, na mu kupakibwa kwa manga, kushi kukumina kwi'File Mukulu shya-muwa. Anka bantu bebungi pa kupusha mitanyo mu mbidi mwabo na kumona malwa a bipaso bibungi, na lufu lwa

bakwabo, biabia tabakula'shi: Kwi muntu bando (butshi), abo tabeuku biakuteka kwi'File Mukulu Shyakapanga mulombene kwitukwasha mu bino bintu bioso, oo. Bakwete kwenda kwi bananga abadi nfwalanga yabo bisumanga kushi kwibakwasha ku lwinyi lukalo lwabo. Nyi pauno mwanda Efile Mukulu balungwile Bena Isalele eshi: Tanukumanga kuleka shya-butshi na muwa. *Kikatukilo 22:18*. Efile Mukulu eshi: Munkatshi mwenu tamwikalanga kwete kubuka mbuko, akitshi bibubi, sunga nshya-kulwana, sunga nshya-masende, sunga nsha-butshi, sunga kwete kwisamba na bikudi, sunga shya-malenanyi, sunga ngesamba na bafwe, boso abakitshi bino bintu, be bubi kwi'File Mukulu. *Kielekiesho 18:10-12*. Tanukumanga kusangakana na bashya-masende, sunga mbababuka mbuko, tanukumanga kwibabuka, mwanda'mi nyi Yehowa Efile Mukulu enu. *Bena Lewi 19:31*. Muntu ese esangakana kwi bashya-masende na bashya-kubuka pa mwanda wa kulonda bipikwa biabo bia masandji, nankatulu meso ande pa yawa muntu nankamukatusha munkatshi mwa bantu be. Elamunei, biabia nwikale ba kishila, mwanda'mi nyi Yehowa Efile Mukulu enu. *Bena Lewi 20:6-7*. Binyibiabia anka Yesu Kidistu bupenka bwe n'E Mukudi etu, mulekiele bubi bwetu boso. E, nyi ñanga a binyibinyi, mulombene apwisha masungu etu oso. *Ñono ya 103:1-3*. Su kwi muntu munkatshi mwenu akumbu, biabia etanyine bakulu bakikoñeno ki'Efile Mukulu, abo bamutekiele na kumushinga mwimu mwishina dia Nfumwetu, na luteko lwa lukulupilo. alukapasha yawa akumbu, na Nfumwetu akamubusha, sunga basole mwanda aukamulekielwa. Biabia mwisokoshene milwisho yenu, na kwitekieshena'shi: Nupashibwe. *Yakoba 5:14-16*.

Binyibiabia obe pokwete kubadika dino ebuku, Efile Mukulu kwete kwisamba n'obe, akwitanyina'shi: Alul'eshimba diobe ompe dianka, biabia kikudi kibi kia bunkofu akikutosha'shi: Tokuminanga lelo, tengiela maloba sunga lungi lubingo. Kwamba'shi: Tokuminanga, banda kutala bintu bia pano pa nsenga. Talanga subokumina mwi Yesu okamono kuposolwa kukata, mwanda Yesu bafikile pano pa nsenga mwanda wa kukula boso abamukumina babadi, bamunwe mu muwa wa lufu mu bipwa biabo bioso bia muwa wabo. *Bahebelu 2:14, 15*. Anka su twemukumine eyi dia Nfumwetu biabia akaumish' eshimba diobe anka pamune kibolwa kia nkofu. Biabia atwe namu ambikunyi? Atukapanda naminyi su tube kala na kidiodi?

5. NGIE — Ngie namu nyi nyema shya-bukielo bukata, shya-kifulo kia kusumbula mase. Biabia ngie nyi nkipwandjikisho kia ntomboshi, na bukielo bushya-bwisha kapindji, Binyibiabia su bino bintu bi munda mwa muntu, euku kukita mianda ibi bikata ya bipaso na bipaso, kunfudilo aka-

solo mwanda wa kutapana, Anka Efile Mukulu akula'shi: Leka bukielo, osumbule nsungu. Twenyeñanga eshimba, kwinyenga kw'eshimba akufisha kukita kwa bibubi. *Nono ya 37:8*. Bukielo nyi nkifita, nsungu nyi mwanda wi bukopo. Bukielo nyi nkututshika (kwa mu mema a kata) *Nkind. 27:4*. Anka bantu be na binangu tabakekala na bukielo bwi kino kipaso, Efile Mukulu eshi: Tokwatanga bukielo bukidi mwishimba diobe, mwanda bukielo abubombela mu kiadi kia mutshikame. *Mulungudi 7:9; 11:10*; Anka binobino kashai bino bioso kwa nudi, kufunafuna, bukielo bubu, nsungu na kukana mulomo. *Kolose 3:8*. Yesu bakwile eshi: Okumine mukwenu bubiodi mwikumine, wekale kifulo na bakushikwe. Efile Mukulu betulaile eshi: Su anulekiela bantu kusola kwabo, ami namu nankenulekiela kusola kwenu.

6. NYOKA — Nyoka nyi nkipwandjikisho kia kiutu (lupuna), mwanda nyi nyoka badimbile Eva mwifuba dia Edena, balwishishe mwabi we oso, na kifulo kie kikata kwi'File Mukulu; Binyibiabia Kafilefile, uno mwikeilu bapone mu bubu, pabamwene Adama n'Eva babatulwa bu banfumu ba bintu bioso, kiutu kibatwele munda mwe, eshi: Nankebalwisha, mpaa na mwabi wabo winyi, mwanda'bo bakwete kwisamba n'Efile Mukulu, ami nansumbulwa. Kafilefile batshibile kipwano kibadi mu nkatshi mw'Efile Mukulu na bano bantu babidi babapangile. Biabia kino kiutu ki mu mashimba a bantu bapwe kupona mu bubu mpaa na lelo, Mwanda bebungi be na mushikwa kwi bangi bakwabo, pabebamono be na mwabi, sunga bupeta na mwabi mu kifuko kiabo, biabia pa mwanda wa kiutu (lupuna) abatempo kulwisha miabi yabo, na kwibamweshwa malwa. Kiutu (mukao) wi na bukome bu mashama, akitembe bu ndjimi ya kalo. Lono lwa *Solomone 8:6*; Mukao auusha mwishimba dia muntu, mitentekiesho ibi ya kumweshwa'nka bakwetu malwa; Inyi ino mitentekiesho aifisha bebungi ku buntomboshi. Kwi ben' Efile Mukulu na balungudi, nkilombene kudimuka kwikala na kiutu (mukao). Anka tuushibwe na lusa lw'Efile Mukulu Namene, kutshina'shi, tala twakashimisha mwabi wa mu mifubo y'Efile pakwikwatshishena kiutu. Mwanda kifulo ki'Efile Mukulu kibapongolwa mu mashimba etu kwi Kikudi-E-Selelee Abetupele; *Loma. 5:5*.

7. KILWA — Kilwa nyi nyema adiya bioso biamono pashi; nyi nkipwandjikisho kia bubu bwa meso atone (malaka) bwa kukieba kwa kasungilo, na bubu bwa malaka a bupeta; nyi mushi wa bubu bosu bipaso na bipaso. *I Temote 6:10*. Kwi bingi bilwa mu mapia mu ino nsenga ya Congo, abidiya kushi kukoka, mpaa na pabisabika nkufwa. Biabia muntu shya-meso atone teuku kukwasha balanda, sunga bafudile, kwete kukalakala mu bipaso biya na bibu kukieba'nka amone 'mono ya ba pano pa nsenga; inyi aidibwa na

mpesu na ndjamalonda. Nyi pa uno mwanda Nfumwetu Yesu Namene bakwile eshi: Tanwibombeleshanga bupeta buneme pano pa nsenga, ooo, pe mpesu na ndjamalonda biakwibudia. Anka ebombeleshei bupeta buneme amwa mwiilu, mushi mpesu sunga ndjamalonda bishiakwibidia, sunga bangifi bakutubula kukieba kwa kwiba. Mwanda kwakwa kwi bupeta bobo buneme, eshimba diobe adikekala kwanka namu. *Mateo 6:19-21*. Kana, na kifuko kie kioso kibatutshikile pa mwanda wa malaka a 'mono ya bilonda bia nsahabu na nsilive na bilamba bia ntumbo ikata mwifuku dimune. *Yoshua 7*. Mpa na Yudasa Isakadiote, badi mwana a bukishi a Nfumwetu Yesu, biabia bafwile pa mwanda wa kifulo kia 'mono, kushi kwikala na Nfumwetu kifulo. *Mateo 27:3-5*.

8. SATANA — Anka uno Satana nyi nfumu a madimi oso na boso abadimbana, ank'e nyi babangile bubi boso, e kwete kubombela munda mwa mashimba a bashi bakumine. Biabia Yesu bakwile eshi: Anwe enu nshyenu nyi NDiabola, na bia meso atone bia nshyenu bianudi bate mashimba kwibikita. Mwand'e badi ntapanyi na ku kibangilo, kushi kwimana mu biabinyibinyi, mwanda munda mwe ta mwi biabinyibinyi. Mwanda padimba madimi edimba namene, mwanda nyi nshye madimi. *Yoa. 8:44*.

9. LWENYENI. Lwenyeni alupatula mwanda wa muntu e munda e na bantu boso munda mwabo. Mu kino kifwatulo lwenyeni ndufite fututu, ndwikale biabia pa mwanda wa bubi bukata bwa bipaso bibungi abikitshi muntu, pa uno mwanda muntu e munda nyi mufite fututu, tauku kufuba mifubo ya kudimuna muntu, mwanda nyi mushikie matwi e kwi lango adituku kwi'File Mukulu. *I Tem. 4:2*. Twifubulei pepi n'eshimba dia binyibinyi, mu lushingulwilo lukumbane lwa lukulupilo, na mashimb'etu amaminwe soo ku muntu e munda e bubi. *Bahebelu 10:22*.

10. EYISO. Eyiso di'Efile Mukulu adimona bioso bi mwishimba dia muntu. Ta kwi kifwame kwi'File Mukulu. Nyi mbinyi Efile Mukulu Euku mianda yoso, sunga binangu, sunga mitentekiesho, na bioso abikiebe eshimba dia muntu. Petelo bakwile'shi: obe Nfumwami, obe namene weuku biso, na mwandji mukukuminyine weuku. *Yoa. 21:17*. Meso a Yehova e kosokoso, atala pa bebubi na bebuwa. *Nkind. 15:3*. Meso e atala bana ba bantu, bikopwelo bie abibatompo. *Nono ya 11:4-7; 33:18; 34:15*.

11. NDJIMI YA KALO. Biabia ino ndjimi aifunyu eshimba dia muntu, aipatula lusa lw'Efile lukwete kwifunya eshimba dia muntu mubi, ikwete kutompa kokiesh'eshimba die di mashika kalo, kwamba'shi, okumine mwi' File Mukulu. Mwanda Efile Mukulu mwishikwene na bubi, anka e na muntu kifulo. *Yoano 3:16*. Winyi Nfumwetu tamukumin'eshi, kulwile muntu

sunga umune, anka kwamba'shi, boso balule eshimba. *2 Petelo 3:9*. Uno mwanda ngwa binyibinyi, ngupwandjikile kukuminwa kosokoso'shi, Kidistu Yesu bafikile mu kupasha balwishi. *1 Tem. 1:15*. Kwi kusepela mwiilu apaluluka mulwishi umune eshimba. *Luk. 15.7*.

Kumina mwi Yesu bafikile pano pa nsenga kutwala bubu bwa pano pa nsenga. *Yoano 1:29*.

12. MWIKEILU. Anka uno mwikeilu e bu kipwandjikisho kia mwanda w'Efile. Biabia Efile Mukulu atuma eyi die lelo uno kwi muntu munemenwe na bubu, eshi, alulukie atambule lusa lw'Efile Mukulu bwi'tata aditwele munda mwe. Biabia bamwikeilu boso ta mbikudi bakwashi, batumibwe mu kukwasha aba abakapiana kipandjilo su? *Bahebelu 1:4*.

13. NKUDIMBA. Nkudimba nyi nkipwandjikisho kia Kikudi-E-Selelee a binyibinyi, bafikile mu kuponesha ba pano pa nsenga pa mwanda wa bubu bwabo, na pa mwanda wa kululama na pa mwanda wa kutshiba kimu. *Yoa. 16:8, 9*. Ku kino kifwatulo E pasha p'eshimba dia muntu, teuku kwi-mutwela mwanda mwi bubu. Yesu bakwile'shi: Talai nyimwimane pa kibelo nkwele kututula su muntu apusha eyi diande anshitwila kibi, nankatwele mwadi nankekala n'e, E akekala n'ami. *Kibafumbwilwe 3:19; 20*. Biabia su'eshimba diobe ndjifwane kino kifwatulo sasakata bukidi walulukye p'eshimbadiobe, biabia oketanyina p'eshina dia Nfumwetu Yesu omone biakumon'shimba dipia difwane kino kifwatulo.

KIFWATULO KIA KABIDI

Biabia kino kifwatulo kia kabidi kikwete kulesha eshimba dia muntu babanga kukimba Efile-Mukulu pa kwalul'eshimba, Tala ku kifwatulo omono mwikeilu mukwate lupete lwi mashi, nyi nkupatula'shi, nyi mwanda w'Efile Mukulu autala na wa kusasakata, na kukila mpete ya ngoshi yoso ya kimpulu mashi, autubula mpaa na kulamuna kwa kwi'shimba na kikudi na kwa binyingwa na mwimu wa bikondo, ngwa kushingula mitentekiesho na bia kufuna kw'eshimba. *Bahebelu 4:12*. Binyibiabia, ebuku di'Efile adiakula'shi: Efuto dia bubu nyi ndufu, dingi'nyi'shi: Anka mubasangwidile bantu boso kufwa mususa umune, anka ku mongo kwa'lo nyi nkimu. *Loma 6:23; Bahebelu 9:27*. Mwanda kupisha kwa muntu shi mukumine nyi nkwelwa mwi-shiba dia kalo. *Kibafumbwilwe 20:15*.

Anka mu imo mboko ya mwikeilu nyi mukwate kibobwa (kiula) nyi nkwitulesha'shi: Atwe boso atukafu. Twi na mbidi yetu kifulo kikata: atwidisha, atwiifwadika, atwiisapila na kukindakana koso. Sunga mbiabia ino mbidi aikafu aikanyanga mu nsenga. Ino mipwa yetu na bikudi bietu, tabikafu sunga mpapelapela; abikafiki ku kimu ki'Efile Mukulu.



ESHIMBA DIKUMIBWE DIKOKIELE

Mu kinyi kino kifwatulo kia kabidi, akitulesha'shi, nyi muntu musodi a mianda babanga kukimba Efile Mukulu, kwifwakana mwanda w'Efile Mukulu, na kufungula eshimba die, biabia lusa lw'Efile Mukulu namu alutwele mwanka; na Kikudi-E-Selelee a Efile Mukulu amunyika mwanka, etata di'Efile Mukulu adibingi mufito oso. Apekala etata di'Efile aditwele munda, biabia mufito oso wa bubi ausuku lubilo bikabe. Penyipapa bubi

bwa bipaso bioso abwikalanga abupwandjikhisha bu nyema ya bipaso na bipaso abukatuka.

Biabia obe kuku kwete kubadika dino ebuku kumina Yesu atwele munda mobe mw'eshimba, mwanda E, nyi'tata dia pano pa nsenga, biabia yoso ibubi yokita mafuku oso akakupa ngobesha yoshokeikitshi dimo. Yesu bakwil'eshi: Ami uno nyi'tata dia pano pa nsenga; awa andondo takatambuka mu mufito, anka akekala n'etata dia muwa. *Yoano 8:12*. Mwanda bantu mbakumine mufito bashikwa etata. Binyibiabia Yesu bakilekile ku nshibo y'Efile ku Yelusalema. Babingile bantu abadi abeudishena bintu mu nshibo y'Efile Mukulu, nyema ya bipaso na bipaso, bakwile'shi: Kibafundjilwe' shi: Nshibo yande aikatemunwa bu nshibo ya nteko; anka'nwe nubeyalula taidi ya kwikongiela ba ngifi. *Mat. 21:13*. Biabia eshimba dia muntu namu ndjipwandjikile kwikala ipatulwe y'Efile Mukulu, nyi nkupatula'shi: Efile Mukulu abombela mwanka mwanda wa kwiyilumbula na kuusha etata mwanka na lusa na muloo. Yesu tamufikilenka'ko kwitulekiela kwa milwiso, ooo, bafwidile mpaa na kwitumanuna ku bubi na ku bukome bwabo. Binyibiabia su Mwana benukulu bu balufiantu, anukekala balufiantu binyibinyi. *Yoano 8:36*.

KIFWATULO KIA KASATU.

Mu kino kifwatulo kia kasatu akileshe mwikelo w'eshimba dia muntu badi musodi a mianda kwibedi, binobino bapu kwalula eshimba die binyibinyi. Winyi uno muntu bapu kushingula bubi bwe bukata, na kwiuka'shi: Nfumwetu Yesu bafwile pa nkulusu pa mwanda wa bubi bwande. Biabia mwikeilu namu kwete kumulesha nkulusu ya Kidistu mwi'buku di'Efile Mukulu, biabia uno muntu babanga kwiuka bi lusa lw'Efile Mukulu kwi bantu boso, lubamwekele mwi Yesu Kidistu Nfumwetu, eshimba die dibasunguluka binyi. Bino kwete kwakula'shi: Yesu Kidistu nyi Mwan'Efile. Bafikile kutwala mianda yande, bakuminyine kunfwila pa mutshi wedibwe muloa. Binyibiabia pakubala mwi'buku di'Efile Mukulu, emona namene bu muntu mubi, biabia emono mu lumweno mwikelo we, na kwiukashi: Nashilwile bishila bi'Efile Mukulu, a mwiiu, natembele kula n'Efile Mukulu a binyi. Biabia pakukokiesh'eshimba die na kuteka na mpolo mu meso, apusha bufu bukata; kwete kudila na kudila, anka Yesu efubula pepi n'e mu kumupa mwabi. Biabia lusa na muloo bia kwi'File abitwele munda mw'eshima die, bino namene euku'shi: Mase a Yesu Mwan'Efile, etutosha ku milwiso yoso. *Yoano 1:7*. Yehowa e pepi kwi'ba bashya mashimba akasendeleshi, apasha baba bashya-bikudi bia kwipelesha. *Nono ya 34:18*. Ebuku di'Efile adiakula'shi: Nankatala ku muntu e bu mulanda, shya-kikudi kia kasendeleshi,



ESHIMBA DILANGIE

abasuka pa mwanda wande. *Isaya 66:2*. Binobino Kikudi-E-Selelee amulungula munda mwe'shi: Mwan'ande kankamana, osepele, mwanda milwisho yobe yoso ibakulekielwa, biabia yawa atala ku nkulusu ya Yesu na ku mase a Yesu abasumbukile pa mwanda we; binobino akula'shi: Kita kiande kia bubi kibashimina, mwanda Yesu batwele kubofula kwetu na kwitenteka mitanyo yetu. Ank'E batapilwe pa mwanda wa bubi bwetu, baku-

pidibwe pa mwanda wa kusola kwetu; malwa akufukama kwetu abadi pa mbidi p'e; ku mikombela ye tubapashibwa. Yehova batentekiele bubi bwetu boso pa mbidi p'e. *Isaya 53:4-6*.

Etata dia Kikudi-E-Selelee dibapu kumunyika mufito ubadi mwishimba die, tamudi selee. Bapu kutumpibwa mu mase a Yesu batoko mpaa n'eshimba die soo. *Isaya 1:18; I Kod. 6:10, 11*. Binyibiabia Yesu bakwile'shi: Nyimbinyibinyi biyaninulungula'shi; awa akumina mwimi e na muwa wa ikala-ika. *Yoan. 6:47*. Mwadi'E, twi na kikudilo pa mase e, nyi ndulekielo lwa milwiso mulombene bupeta bwa bumuntu bwe. *Efisesa 1:7*. Penyipapa yawa tadi n'eshimba dipia te na kifulo dimo na bintu bia pano pashi, ooo; binobino tadi'nka na lukalo lwa kufubila Efile Mukulu na kumulangwila.

Binyibiabia mu kino kifwatulo nyema yoso aifunku bubi bwa muntu i pasha p'eshimba die, anka Kafilefile takumina kubingibwa mwanka, ooo, kwete kutala'nka ku nyima kwi'shimba kwinyi kwabadi mwanka na luku-lupilo lwa kwamba'shi: Ku mongo nankalukila mwanka dimo. Nyi pa mwanda uno Nfumwetu Yesu kwete kwitudimuna atwe boso bamukumine' shi: Dimukai, nutekie mafuku oso, nukambile Satana biabia akenusuku. *Yakoba 4:7*.

KIFWATULO KIA KANANKA.

Biabia mu kino kifwatulo kia kananka, akitulesh'eshimba dia mwina-Kidistu bapu kumona muloo ulombanyinyine na bukudi mu kitapwa kia Nfumwetu, Mupashi etu, Yesu Kidistu. Mwanda akula'shi: Ami ntanyitumbisha, ooo, anka mu nkulusu ya Nfumwetu Yesu Kidistu nyi kubangipailwe ku bia pano pa nsenga n'ami namu nyi mpamune nafwila pano pa nsenga. *Ngalatea 6:14*. Yesu namene batwadile milwiso yetu mu mbidi ye pa mutshi, eshi, atwe bafwe ku milwiso twikale abatala ba kululama. *I Petelo 2:24*. Mwina Kidistu a binyibinyi nyi mufwe ku bintu bia pano pa nsenga; Twibakamikwe'shi: Tambukilai mu Kikudi-E-Selelee, biabia tanukakwatwa na lwabi lwa mbidi. *Ngalatea 5:16, 25*. Anka tulondei bia kufukama bia muloo na kupatulwa kwa-kishila, su tubebikutwa takwi sunga ngumune akamono Nfumwetu. *Bahebelu 12:14*.

Mu kinyi kino kifwatulo atumono kipwandjikisho kia kibai kia nshibo kibadi kianyibwe Nfumwetu Yesu, nyi kwababamufudile bilamba bie, na nfmbo yaimweka mwanka nyi yababamukupile n'ayo, mwanda malwa a kufukama kwetu abadi pa mbidi p'e, bakupilwe pa mwanda wa kusola kwetu. *Isaya 53:4, 5, 11, 12*. Nfumu Helode na bantu be abadi abapesha Nfumwetu, abamukupile nfmbo, abamufwadikile mutwelo wi lunkwindjinkwindji, abalukile kilongo kia milobo bekitenteka pa mutwe we wa ntumbo. Kushi

Mwihaiabwe ha mutshi
uhingishene hamune na
Kidisitu. *Ngalatea 2:20*

Mwanda'nwe nwi bafwe,
na muwa wenu ngufibwe
na Kidisitu mw'Efile
Mukulu- *Kolose 3:3*

Twibafwile ku milwisho,
biosobi twi na muwa
kw'Efile Mukulu mu
Kidisitu Yesu Nfumwetu
Lema 6:11



MUHUDIKWE NA KIDISITU

kumupa elanga dia bufumu, abamupele'nka ebungu ku mboko ilume; tabe-
tutula ku mpala kwe, tabamwamba'shi: Nemuna-mwa: Obe Nfumu a Ba-
Yuda, biabia abamufile mata, abamwatshile dianka tabamukupila'dio ku
mutwe. Binyibiabia pababapwile kumusepa na kumupesha, abamwatshile
benda n'e mu kumwipa pa nkulusu.

Biabia kwi bantu bebungi abatemunwa bu ben'E-file, nono y'Efile aba-

yimbi, anka bikitshino biabo bi bubi abiyipa Nfumwetu dimo. Ta mboso abantemunwa'shi: Nfumwetu, Nfumwetu abakatwele mu bufumu bwa mwiilu, ooo, anka akitshi akikieb'eshimba dia Yaiya e mwiilu. *Mateo 7:21-27.*

Pa mwanda w'edimba dia nfwalanga adimweka mu kifwatulo, nyi nkwi-tutentekiesha mwanda wa Yudasa mubasokwedile Nfumwetu Yesu, e nku-mupana ku makumi asatu a nfwalanga, eshimba die dibadi diule na lwabi lwa bupeta, nyi lubamutule meso e, eshimba. Mu kifwatulo amumweka elampi na lukano, bibadi na basalai bufuku bwababakwete Yesu. Bintu bia bubale nyi biababatele n'abio bubale pa mwanda wa Yesu Nfumwetu. Abalombasha eyi dibatemukile Efile Mukulu mwibuku di'eshi: Ababishena bifwalwa biande abo banabene, na mutwelo wande abeutela bubale. *Nono ya 22:18.* Abatshile bioso bibadi na Nfumwetu Yesu tabidi bu biabo, biabia Nfumwetu namene abamutune aboshi: Tatukumina uno muntu kwikala bu Nfumwetu. Biabia mungi musalai bamutapile mulumbu mu lubafu, mase na mema bibatukile mwanka. *Yoano 19:33-37.* Pabasamine etombole Petelo namu batunyine Yesu misusa isatu ishima ku mpala kwa nsongwa-kashi. Biabia obe namu kwete kukumina Yesu bu Nfumu obe a mafuku oso mu bintu bioso biokwete kwakula na biokwete kukita su? Kwete kumona bufu ku mpala kwa bantu su? Yesu eshi, yawa akankumina ku mpala kwa bantu ami nankamukumina ku meso kwa Yaiya e mwiilu. *Mateo 10:32, 33.* Biabia awa sh'akatwala nkululu ye kundonda, biabia tamulombane, ooo. *Mateo 10:38.*

Ebwe dimanunukie onfie mobe mwi mwabi. Mema oso na mase. Biobe bibatukile. Bikale bia kumpasha. Kumanununa ku bubi.

KIFWATULO KIA KATANO

Kino kifwatulo kia katano namu akipatula bi'shimba dia muntu badi musodi a mianda. Lelo uno tadi mwin'Efile a binyibinyi. Eshimba die dibapu kwaluluka tadidi bu nshibo y'Efile Mukulu ya binyibinyi, mwa kubombela Efile Mukulu Yaiya na Mwana, na Kikudi-E-Selelee bu muyile mulailo wa Nfumwetu Yesu eshi: Su muntu en'ami kifulo alame milangilo yande, biabia Yaiya akekala n'e kifulo, atufiki kwadi tubombele n'e. *Yoano 14:23.* Anka mwi Nfumwetu Yesu nyi mwatumwena mwabi, nyi mwamuketutumbish'Efile Mukulu. *Luka 1:52.* Binobino eshimba tadidi bu nshibo ipatulwe i kishila y'Efile Mukulu; bubi namu bubapu kutuka. Biabia mu mbalo ibadi nyema ya Satana, sha-madimi oso, Kikudi-E-Selelee tadi mwanka, Kikudi a binyibinyi tadi mwishimba mwamwa. Eshimba adikala adilondo bintu bia bwina mbidi, binobino eshimba tadidi bwi'fuba dia mitshi ya bikuba.

Kifulo
Muloo
Kufukama
Lukuluhilo
Ngalatea 5:22-23

Kahunanyi
k'eshimba
Kasendeleshi
Buwa knhohelo
Butontshi
Bwa mbidi



TEMPELO Y'EFILE MUKULU

Anka bikuba bia Kikudi-E-Selelee nyi mbino: lusa, tusepo, moolu, na lwishinko lw'eshimba, na kifulo na buwa, na lukulupilo, na kasendeleshi, na butontshi bwa mbidi, na bingi abitoshe'shimba dia muntu na di'Efile Mukulu namene. Binobino tadi lutabi alupa bikuba ku mulundo wa binyi-

binyi, wawa nyi Nfumwetu Yesu Kidistu. Biabia mwakumwena bikuba nyi 'muno: Anka olamate kwi Yesu Kidistu, mwanda we wikale modi; *Yoano 15:1-10*. Pakubatshishibwa na Kikudi-E-Selelee kuula mwishimba diobe, biabia muntu akamono mwakukambila lwabi lwa mbidi, na kwipaa muntu a kala, okamono mwakutembela mu Kikudi-E-Selelee, kushi kukokiela lwabi lwa mbidi. Kumona kwa muwa pa kukumina mwi Yesu Kidistu, na'bo bukome bwa kukambila n'abo bia pano pa nsenga, okanyinamana pa kwiuka'shi: Nfumwetu Yesu Kidistu akiebe kufika dimo, na pakubombela mu lusa lw'Efile Mukulu ikalaika.

Ebuku di'Efile adiakula'shi: Mwabi kwibo be na mashimba atoka selelee, mwanda'bo abakamono Efile Mukulu. *Mateo 5:8*. Biabia nfumu Davidi sunga badi mpeta na bukome bwa kukambila beshikwanyani n'e boso ba pano pa nsenga, anka beukile'shi, kwi ngoshi ikata ikile yoso ibakambile ya pano pa nsenga, nyi ngoshi y'eshimba die yashi mukambile, nyi pa uno mwanda batekiele'shi: Obe Efile Mukulu mpangule eshimba ditoka, ongalule kikudi kipia kia ngobesha munda mwande. *Nono ya 51:10*. Mwanda muntu teuku biakwipangil'eshimba ditoka munda mwe, ooo. Anka su'efubula kwi'File Mukulu, na kwaluluka p'eshimba binyibinyi, na kwisasa kwi' File Mukulu, bu bibakitshine nfumu Davidi, biabia Efile Mukulu akapang' eshimba dipia munda mwe na kumulekiela bubi bwe boso; Mbikile buwa kwifwana mwana mushimine, balekiele ngulube na kwaluka kwi nshye, eshi: Obe Yaiya, nasolo mwanda ku mpal'eilu na kodi. *Luka 15:21*. Efile Mukulu asepele kukwasha basodi ba mianda boso, mwanda E namene bakwil'eshi: Nankamamina mema atoka pa mbidi penu, anwe anukatoko soo, nankenutoshu ku bi butete bienu bioso na ku mankishi enu oso. Nankenup'eshimba dipia, nankatulu kikudi kipia munda mwenu, nankakasha eshimba di bwibwe munda mwenu, nankenupa eshimba dia bu mbidi. Biabia nankatulu kikudi kiande munda mwenu kwinkunkusha mu bishila biande, anakalama bishila biande na kwibikita. *Ezekiele 36:25-27*. Nyi kipatulwilo kinamene kibakiebele Efile Mukulu pabatule Kilombeno kipia pano pa nsenga, kibafishishe mu mase a mwan'E Yesu Kidistu.

Binyibiabia mu kifwatulo kino atumono mwikeilu bamweka dimo. Bano bamwikeilu nyi mbafubi bakukwasha bampianyi ba muwa wa ikalalika, mwanda mbebele munkatshi mwa kipempe aba bakwete kumutshina, ebamanuna. *Nono ya 37:7; 91:11; Daniel 6:22; Mateo 2:13, 19; 18:10; Bikitshino 5:19; 12:7-10*.

Uno Satana namu kwete kumweka mu kino kifwatulo, kwete kwimana pepi n'eshimba dia muntu akimbi kibelo kia kutwelela mususa wa kabidi. Nyi pa uno mwanda ebuku di'Efile aditulang'ashi: Nupilei, nutengiele, mwa-

nda mwitupishanyi n'obe Diabola akindakana bu ntambwe na kukimba adia'kukokota. *I Petelo 5:8*. Biabia tudimukiei mwanda Kafilefile kwete kufika kwatodi pa mwanda wa kwituponesha'twe ben'Efile na kwitumpa ku ngabi'abi ya pano pa nsenga, kwete kwialula bu mwikeilu'etata pa mwanda wa kwituponesha ku madimi'e. Anka tukambilei Satana e aketusuku. *Yakoba 4:7*.

KWIFWATULO DIA KASAMOMBO

Kino kifwatulo akitwinyongosha pa mwanda wa kumona eshimba dia muntu kwete kuluba, kwalukila ku mongo. Omumono en'eiso dimune di-bwikile, nyi nkupatula'shi: Uno muntu bapu kukwata mashika bikata mu bwini'Efile, babanga kwilamuna pa nkatshi, dingi eiso taditala ku bintu bia pano pa nsenga, biadi n'abio kifulo kushi bufu, etata diayikala n'adio munda dibapu kushima, takumina kufwambuka dimo na Kidistu. Mitompo aifunyu eshimba die, te na bukome dimo bwa kwiikambila. Takiapusha dimo eyi di'Efile Mukulu, mwanda Satana bapu kushika matwi e, na mianda ya madimi. Pangi kwete kwenda ku kipwilo bwi'tulwe, busesa tabudi munda mwe. Binobino tadi na mashimba abidi, mwanda kwete kwasha masha na bintu bia pano pa nsenga, anka takumina bangi bantu kwiuka. Pa uno mwanda lweinyenyi lw'eshimba dia muntu'e munda taluki'alumunyika kalolo, ooo, na nkulusu ye taiki'aitwadika biya na musanku, ooo. Lukumino lwe talutelebeya, taki'akumu sunga nkuteka kwi'File Mukulu; binobino Kafilefile tadi na muloo wimoo pa kumona mbalo ya kubombela mwishimba dia uno muntu, bapu kwaluka ku mongo.

Biabia kikudi-kibi kia bu Nduba shya-kwitatula akibanga kukimba mbalo ya kutwelela, biabia uno muntu abanga kwialula tadi muntu a tunkusu, na kwitatula kukile, (shi'atudilwa mwanda) bapu kwilwa'shi: Kupanda kwe kubadi'nka buntu bw'Efile Mukulu bupenka bwabo. Kukulwakolwa namu takututula pa kibelo ki'eshimba die, akukimbi kwakutwelela. Kuku kampanda eshi: Mukome toma tupela tupela, tatukita kintu, (bobe bwina-Lesa pe; anka'bio biashi, todi'efu bu kanabwatata mwikoba dia biashi?)

Biabia pa kukaka tupela, eshimba tandjikishe, tashindji tubwetele twimoo! tutalengie'bi bialele mukolwe, binobino kikudi kia kukolwa kibapu kumona mbalo munda mwe. Biabia e pa kupwa kukolwa kikudi kia kukolwa kibatwelela mwishimba die, tadi mushale mu kibumbu kia bena nsenga, bandumba bamwele lwengo, tabamutompo, bakwete kutshibuluka lusha lwimoo! papa dimo takiabasuka, (tadi'nk'eyo). Tebakakila kufita, kapi-ndji n'aka kikudi kia lusandji kibamono yakio mbalo mwishimba. Kukila papa bitomwanga bioso mwabiafukwa, a manfwank'o a binyi e, mwanda Satana tamutonwena meso'shi: Kita! kita! tadi nfumwe.



ESHIMBA DITOMPIBWE DILAMUNE (Hankatshi)

Binyibiabia uno muntu tafunu mwishimba na lupete lwi mashi, pano talesha kipaso kimune na'ba abasabula bwina-Kidistu. Bano bantu bakwete kusosomesha mashimba a ben'Efile Mukulu, na kwibakolomona na mianda yabo ya kasabu, na bishima biabo bia lunkunko, mwanda muntu e na mashimba abidi teuku kukambilwa mwishimba die pakufutulwa na bantu, ooo.

Kwete kutshina bantu kukil'Efile Mukulu. Kwakulwa bibubi ku bantu akumutshinyisha'shi, tala bakanamba abi nabi. Abanga kwilamuna kwi'File Mukulu. Biabia pakumona malwa na pakufitshishw'eshimba, sungu na bukielo abitwele mwishimba die. Dimo pakumona bangi bantu abamono ediba diabo kuminwe, e kwe kumona kwi bu kupatula, biabia nyoka mubi a kiutu atwele munda mwe na butshi bwa kifita abulondo'nka lubilo.

Binyibiabia tudimukie, mwanda wa kutshina'shi, tala twakasola mwanda mu lwabi lwa bupeta. Tutee matwi kwi' lango dibakwile Nfumwetu Yesu eshi Pasukai, nutekie, kutshina'shi, nwakatwela mu kutompibwa. *Matteo 26:41*. Nyi penyi pa mwanda unabene umongie ngieso, wa yawa atente-kiesha'shi, nyi mwimane adimukie, tala apona. *I Kodinda 10:12*; Fwalai ngabo yoso y'Efile Mukulu ya ngoshi'shi, numone mwa kwimena ku biakibembo kia Satana. *Efisesa 6:11-18*.

KIFWATULO KIA MUSAMBOBIDI.

Ku kino kifwatulo namu akitulesha mwikelo wa muntu batompele kulonda Efile Mukulu kapindji, anka bakambilwe na mitompo ya Satana. Batompele bia bwin'Efile Mukulu, anka tamwalulukie kwishimba binyibinyi mwanda tamwipane kwi'File Mukulu. Anka Nfumwetu Yesu etulesha mwikelo wa dino eshimba, eshi: Biabia kikudi-kibi pakibatukile munda mwa muntu, kibaile mu kipindji kiume kukimba kikisho, pakibakutshilwe kumona, kibakwile'shi: Nakaluka ku nshibo yande inatukile. Pa kibafikile kibasanene ngikombwe ya lumbulwa bibuwa. Penyipapa kibalukile mu kwata bingi bikudi-bibi musambobidi bikile'kio ki namwinyi bubi, bibatwelele biabombela mwanka; nyikashi ya kunfudilo ya yawa muntu ibakile ya kwi-bedi bubi. *Luka 11:24-26*. Biabia kibebalombena mu lwalwa lukindji binyibinyi'shi: Mbwa balukila dimo ku kiadi mulase, na ngulube mutumpwe balukila mu matekie. *2 Petelo 2:22*.

Binyibiabia kino kifwatulo akitulesha muyile mwikelo wa muntu mwalukie ku mongo. Penyipapa bubi na budimbanyi boso bwa bubi abialukila dimo munda mwe; abubombela mwanka. Biabia mpala ya uno muntu aitu-patulwila muyile bubi bwa uno muntu bwi mwishimba die. Uno muntu te na muloo, ooo, mwanda Kikudi ki'Efile akimuponesha mu bioso bibubi biakitshi. Nyi mbikile buwa e kwalukila kwi'File Mukulu, na kwakula pamune bu yawa mwana mushimine, kwamba'shi: Obe Yaiya, nyimulwishe kumpal'eilu na kumpala kobe. *Luka 15:1-24*. Binyibiabia nshye pakupusha kusendela kwa mwan'e, bamulekielele bubi bwe boso, bamutwesheshe mu nshibo ye na kusangala kukata.

Anka kino kifwatulo akipatula mwanda wa baba abasolo mianda mafuku oso, kushi kwilanga, bash'abakimbi biabadi'akwibalekiela bubi bwabo,



ESHIMBA DIFUTALE EFILE MUKULU

sunga kwifubula kwi Yesu. Banda kutala mushalelo ushale Satana pa nkwasay'eshimba dia muntu, nyi pa uno mwanda uno muntu teku kukambila mitompo ya Diabola, munda mwe nyi muule mifufwa ya bafwe na kushula kwa bishila koso. Anka nfumu a madimi nyi mushale pa lupuna-nsulu lw'eshimba, lubadi'akupebwa Kikudi a Binyibinyi, nyema yoso ya bubi bwa tipaso na bipaso, ibapu kwalukila munda mwe. Yawa asabula mukanda wa bishila wa Mosesa, afwe, kushi kufwilwa lusa, ku bishima bia tumonyi

tubidi sunga tusatu. Anwe anutentekiesha naminyi kukishakisha kwa ma-lwa akalombana kwi muntu bashine Mwan'Efile Mukulu mushi mwa ngwa ye, bapwandjikishe namu mase a kilombeno abamulamunwine selelee bu abisumanga, na kukaa Kikudi kia bumuntu. *Bahebelu 10:28, 29; 2 Petelo 2:1-14.*

Binyibiabia su kino kifwatulo akileshe mwikelo wodi n'ao, obe kuku mukuminyibwe, bibuwa oitanyine kwi'File Mukulu n'eshimba diobe dioso, kushi kupufianya. Mwanda Yesu Kidistu akobesha kupasha boso, E, aka-kulekiela bubi bobe su okumina n'eshimba diobe dioso, biabia akatusha bioso bia Satana mpaa na bibumbu bie bia ngoshi, akebisumbula kulakula. Binyibiabia fika kwi Yesu anka pamune bibafikile awa badi na busungu bwa kifwi, badi akula kwi Yesu eshi: Su okumuna ouku kumpasha. Biabia Yesu bamufwidile lusa amukuma. Bamulungwile'shi: Nankiebe opande. *Mako 1:40-41.*

KIFWATULO KIA MWANDA

Mu kino kifwatulo akitulesha mwikelo wa muntu shi'abandjile kuku-mina mwi Yesu; binobino e pepi na lufu, mbidi ye ikwete kufwambuka pa mwanda wa mitanyo ya lufu. Binobino kwete kususa na kunangushen'anka wa lufu. Mwanda lufu lubamupulumukila e tabandjile kukumina. Binyi-biabia bioso abimusangasha munda bibapu kusuka. Binobino kubashala'-nk'efuto dia bubi, kufwambuka na mitanyo ya Kalunga-Nyembo ka kalo, kababanga kumukwata. Eshimba die tadidi na lukalo lwa kuteka kwi'Efile Mukulu, anka tamono biakuteka kalolo, mwanda tabasabulwile lusa lw'Efile Mukulu mu mafuku ebungi. Misambo yoso yababadi abesamba na bakuku be pano tai na kiaimukitshina dimo. Bupeta bwe bubadi mukulupile tambu-mone mwakumutentekielia angi mafuku, sunga nkupasha muwa we, sunga nyi nkupudisha mitanyo mu muwa we. Teuku mwakutentekiesha muyile mianda y'Efile, ooo, mwanda Kafilefile tabapwile kushik'eshinda die dioso.

Penyipapa bintu bioso bia pa nsenga bibadi n'abio kifulo, bibapu ku-mulwidila, boso babadi abamukwasha tabeuku dimo kumukwasha. Bino-bino, bakula ki mu kanwa, eshi: Ai-babo taboo! nyi 'mwanda wimo kupo-nena mu masa a Efile Mukulu. *Bahebelu 10:31.* Anka kwibedi badi atentekiesha'shi: Nanandumbule mianda yande mafuku e ku mpala, sunga pepi na lufu, anka binobino tebiakobesha, bapu kukutwa (kutshelewa). Dingi kwi bangi bantu bakwete kufwa lwa kapulukie, bashi'abamono mwakulu-mbulwila mianda yabo pa lusala lwa mitanyo ya lufu. Nyi penyi pa mwan-da ulombene twakimb'Efile Mukulu paki pepi n'etu. Uno muntu taki'apu-sa kintu kioso bukiyuwa. Anka musase wa nsushi aumwamba'shi: Katuka Papa obe mwelwe miloa, nda ku kalo ka ikala-ika, kabalumbudilwe Diabola



NFUDILO YA MULWISHI

na bamwikeilu be. *Mateo 25:41*. Binyibiabia anka mubasangwidile bantu boso kufwa mususa umune, anka kumongo kwa'lo kwi kimu. *Bahebelu 9:27*.


KIFWATULO KIA KITEMA

Biabia kino kifwatulo namu akitupatulwila mwikelo wa mwina Kidistu e kapu, e munkatshi mwa kalo ka mitompo, anka kwete kukambila. Biabia

sunga atompibwa ku mpese yoso, nyi mwimane'nka poo, kushi kusanasana sunga mpapelapela. E na bukome bwa kukambila bioso mu Nfumwetu Yesu Kidistu. Pakwete kukama lubilo lwa mu bwin'Efile, asukila'nka ku mpala; n'eshimba die dishinkie, meso e taekiebula ku lupese na lupese, kwete kutala'nka swee kwi Yesu Kilomboshi kia mu lukumino lwetu. *Bahebelu 12: 1-2.*

Anka Kafilefile na bena kwe, bakwete kukankamena kukieba batwele kwishinda dia mukumine, abatempo kuponesha mwin'Efile Mukulu, anka tabamobesha, ooo, kwitatula na lwabi lw'eshimba dia 'mono, kikudi kia lusan-dji, bioso bi pasha p'eshimba die. Mu mbalo ibadi ishale ngie, binobino takudi kwimane kimbulu, mwanda wa kwitulesha'shi, bubi abwitukwata mu bipaso bibungi, abwipwandjikisha bu kintu kibuwa pa mwanda wa kwitubembula. Anka mwin'Efile mudimikie apatula bubi, sunga bwafika kipaso kia bwin'Efile, sunga bu mwikeilu etata, mwanda w'Efile na Kikudi kia binyibinyi mbamukile ku meso mu biabinyibinyi bioso. Banda kutala kalolo ku kino kifwatulo, takwi anka nyema aimweka bupenka bwayo, ooo, kwi na muntu kwete kusha, uno muntu nyi mukwat'ekopo dia malwa ebukopo bwa lufu ku mboko ye, kwete kwiatambika mwina-Kidistu, (ata) kintu aki-sangasha mashimba a boso bena nsenga. Anka bino bioso tabiuku kutwela kwishimba dia mwinaKidistu a binyibinyi, mwand'e tabapwile kufwa na Kidistu, te n'eshimba dia kulakila bubi na bwina-nsenga, ooo. Tala dimo kwanka okamono mungi muntu kwete kutapa mwina-Kidistu lupete lwi mashi. Luno lupete alupatula mwikelo wa bantu bashi bakumine, bubiabadi bashikwe bana b'Efile Mukulu. Bakwete kumutapa mafuku oso kwishimba na mianda yabo ya lubabo, kapesha, matuka, miloa, abamufwambula mafuku oso. Biabia mwin'Efile ashiki matwi ku bishima bia bano bantu, ele' shimba ku mwanda w'Efile Mukulu namene. Kwete kuñangushena biba-kwile Nfumwetu eshi: Mwabi kwanudi pabeñuka na pabenusabula, na pabenu-dimbila madimi oso pa mwanda wande. Biabia nusepele, nusangale bikata, mwanda bwedi bwenu mbukata mwiilu. *Mateo 5:11, 12.*

Binyibiabia milwisho, n'eshimba dia bwina-mbidi na Kafilefile, bino bioso bisatu, abitempo mafuku oso kulamuna mwina Kidistu na lusa lw'Efile Mukulu, ank'e kwete kwakula na kukankamana, eshi: Aketulamuna na kifulo kia Kidistu nanyi? A nkusumulwa su? A nkatshima-munda, nkubi-ngwabingwa su? A nsala, su nyi muswa? A mukanwa mwa lusu, su ndupete lwa ngoshi lwa kutapana? *Loma 8:35.* Ayoyo, sunga mpakotokoto penyi mu biabia bioso twibakile bakinkome mwadi'e bekele netu kifulo. Biabia atwe patubapu kufwala ngabo yoso y'Efile Mukulu, atwiuku biakulwa mu biangabi'abi bioso bia Diabola, na kukambila mitompo yoso mwi Yesu



ESHIMBA DIOBESHE

Kidistu na kubofusha bioso, nyi mwatukatambwila kilongo kia ntumbo kiabaketupa amwa mwiilu.

Binyibiabia lwenyenyi lw'eshimba lwi mu kino kifwatulo, lukwete kumunyika'nka soo. Eshimba die ndjiule na lukumino, na Kikudi-E-Selelee e munda mwe. Mwikeilu a Efile Muluku e padi, nyi mwanda w'Efile ukwete kumutentekiesha muyile mianda ya milailo y'Efile, ipebwe kwi'ba bashya-

ngobesha mu bioso, na kunfudilo. Kwi yawa akambila, nankamupa kudia ku mutshi wa muwa wi munkatshi mwa Paladisa a Efile Mukulu. Yawa akambila takakumbu ku lufu lwa kabidi, ooo. Yawa akambila nankamupa maana afwame a kudia, nankamupa nyi kabwe katoka, na pa kabwe eshina dipia difundwe panku. Yawa akambila alama bikitshino biande mpaa na kunfudilo, kwadi nankamupa matalwa panundu pa milo. Yawa akambila nyi winyi anakafwadikwe bilamba bitoka, ami namu ntankashimish'eshina die mu mukanda wa muwa, ooo, nanakatemune eshina die ku mpala kwa Yaiya na kwa bamwikeilu be. Yawa akambila nakamutulu bu kibai mu ntempelo y'Efile Mukulu ande, e takatuku mwanka dimo. Kwi yawa akambila nakamukumina kushala nami pa lupuna-nsulu lwande, anka pamune bubinankambile nyi mushale namu na Nshyami pa lupunansulu lwe. *Kibafumbwi-lwe 2:7, 11, 17, 26; 3:5, 12, 21.*

Pa mwanda w'edimba dia nfwalanga diangukie namu, aditulesha'shi: Uno mwina Kidistu kwete kupa Efile Mukulu bupeta bwe n'eshimba die. Biabia te na kanana na nfwalanga ye, ooo, mwanda nyi mukumine kipaso kia bwin'Efile, kukwasha balanda na kutula bi'ekumi, na kutula milambu kwi'Efile Mukulu. Bintu bie bioso mbi'Efile mukulu, biakutumbisha n'abio Efile Mukulu ntumbo. *Malaki 3:10.*

Anka uno mukate na mishipa abipatula mwikelo wa uno muntu, kwamba'shi, nyi mpila mu bioso, shi apatakana mu kutoma kwa bibukopo, sunga kudia mase, sunga kudia kifwile, sunga kingi kintu kishidikwe n'Efile Mukulu kishila. *Bikitshino 21:25.* Anka mwin'Efile tatoma nfwanka mu mpembe, sunga mu kanwa, mwanda boso abakitshi bino bakwete kulwisha mbidi yabo, na kusumbula nfwalanga yabo bisumanga. Talanga yawa kwete kudia bidibwa bilumbulukie, kwete kukwasha mbidi ye bibuwa. Binyibiabia mbidi ye nyi nshibo ya nteko, kwete kufika ku bikoŋeno bioso kushi kupisha, sunga kufika ku mongo, mwand'eshimba die di na kifulo na kuteka, nteko ye i kosokoso, sunga mu nshibo ye, sunga mu kikoŋeno, sunga pa bupenka bwe, mwanda euku'shi: Mwin'Efile teuku kulond'Efile Mukulu su te na nteko; *I Tesalonyika 5:16-22.*

Binyibiabia ebuku dibulukie namu dikwete kupatula'shi: Mwin'Efile abadika ebuku di'Efile Mukulu ngub'ese; mwanda ebuku di'Efile nyi'tata die dia kumulesh'eshinda, na bu lupete lwa ngoshi lwa kwete kufuba n'alo pa kulwa na Satana. Mwanda nyi'buku dineme, di bu mukate we wa kudia kwi'shimba die na bu mema akupwa nyota yadi na'yo, ndjikale bu musulo wa kutumpa biko bioso bia bubu, nyi ndumweno lwa binyibinyi lukwete kulesha mwikelo wa muntu ku mpala kw'Efile Mukulu.

Talanga nkulusu namu, mwin'Efile nyi mutwale yanka na muloo, mwa-

nda euku'shi, su ta kwi kutwala nkulusu pano pa nsenga, takwi kufwala kilongo amwa mwiilu. Binyibiabia su nwibabushwe na Kidistu ku muwa upia, nwikale abakiebe bintu bi mwiilu nyi bia ikalaika, bishi abimweka pano pa nsenga. *Kolose 3:1*. Muntu e bino nyi mupwe kwilumbula, kwete kutengiela kufukama n'Efile Mukulu; e bu mutshi ukunyibwe ku bukunkula bwa me-ma, aupa bikuba biao pa kipwa kiao, ntabi yao ngilamate ku mutshi unabene, autusha bikuba bibungi. *Nono ya 1:1-3; Yoano 15:1-14*. E, tatshina lufu, ooo, mwanda e pakwikala muule na Kikudi-E-Selelee, biabia eshimba die dibaushwa na lusa lw'Efile, mwanda mu lusa tamwi kutshina, ooo. *I Yoano 4:18-21*.

KIFWATULO KI'EKUMI.

Yesu bakwile'shi: Ami uno nyi kisangukilo na muwa, akankumina sunga bafu akekala na muwa. Ese e na muwa, akumina mwimi, takamono lufu sunga mpapelapela. *Yoano. 11:25, 26*. Yawa apusha mwanda wande akumina padi'e bantumine, e na muwa wa ikala-ika; takafiki ku kimu, ooo, anka tabakatukile ku lufu akilakila ku muwa. *Yoano 5:24*. Mwanda mwini'Efile tatshina lufu, ooo, mwanda lufu lubaminwa na kwilobesha. A lufu ngobesha yobe ikunyi? Ank'Efile Mukulu atumbishibwe, n'e etupeya ngobesha mu Nfumwetu Yesu Kidistu. *I Kodinda 15:54-57*.

Penyipapa muntu atembe n'Efile Mukulu teuku kutshina lufu; Anka pakufika efuku die dia kufiluka pano pa nsenga, akende na muloo, bu biba-kwile mutumbwa Paul eshi: Mwanda'mi nanemenwa na mianda ibidi, aku, nyi n'eshimba kufiluka mu kwikala na Kidistu, ako nyi kukile buwa; anka kwikala muno mu mbidi namu, mbikambe buwa kwa nudi'nwe. *Fidipa 1: 23, 24*.

Mwina Kidistu aikala na lukalo lwa kumona mpala ya Yesu bamufwidile na kumukula pa nkulusu. Kikudi-E-Selelee kwete kumutentekiesha mianda ya Yesu eshi: Tanwikalanga na mashimba enyengie, ooo, kuminai Efile Mukulu nunikumine n'ami namu. Mu nshibo ya Yaiya mwi biakubombela bibungi; su amwikalanga biabia nadi akwinulungula. Nankiebe kufika dimo kwirutambula, kwamba'shi kwandji mwikale n'anwe anukekala kwanka. *Yoano 14:1-4*. Anka mwakibafundjilwe'shi: Abia bishi abimweka na meso, sunga nkupushwa na matwi, sunga nkutwela mu mashimba'bantu abio nyi binyi bibabalumbulwidile Efile Mukulu'bo, baba ben'e kifulo. *I Kodinda 2:9*. Takwi sung'edimi dimune dia bantu dilombene kupatula na kushinkamisha bioso bia ntumbo bi'mwa mwiilu, biabadi balumbulwile aba abatambuka mu ngwaa ya Nfumwetu Yesu pano pa nsenga, kupatula'shi: Abatambuka muyile bishila bie.



NTUMBO YA KUFIKA KWA KWABO

Mu kino kifwatulo ki'ekumi atumono mwin'Efile Mukulu na mukiendji wa kwi'File Mukulu, ubafiki mukumutambula, kikudi kie ki na nsambu kwenda kwiilu kwi'File Mukulu. Muwa we na kikudi kie abikamanunwa mu nkano ya mbidi ye ya bu mwita, akakamina kwiilu mu kwikala mu kiadi kia winyi adi n'e kifulo. Binyibiabia abakamukukila na muloo ukata mu kibundji ki'Efile Mukulu. Eyi dia Nfumwetu namene adikamwamba'shi:

Bolumbula shobe, obe we mpika mulumbulukie, a binyibinyi, mukankamane, twela mu buwa mwi miloo ya Nfumu'obe. *Mateo 25:21*. Satana te na matalwa kumukuma dimo, ooo, mwanda nyi ndufu luneme ku mpala a Yehowa, lufu lwa bakudibwe be. *Nono ya 116:15*. Binyibiabia naifwakene eyi mwii-lu'shi: Funda'shi: Bashya-mwabi nyi mbaba abafwila mwi Nfumwetu, kwatshila ku lelo uno mpaa na ku mpala. Ee, nyi bibakwile Kikudi-E-Selelee eshi: Bekishe ku mifubo, mwanda bikitshino biabo abiende n'abo. *Kibafumbwilwe 14:13*.

Binyibiabia obe mukuminyibwe abadika dino ebuku, Efile Mukulu akukwashe, mupe eshimba diobe mwand'e en'obe kifulo. Lelo uno akuse-ndela eshi: Obe mwan'ande mulume sunga mukashi mpe eshimba diobe. *Nkindji 23:26*. Biabia ompe eshimba diobe dipungile, difite bimoo, biabia E, akakupa eshimba dipia na kikudi kipia munda mwobe. Anka kwi kishila kukokiela bia lwabi lw'eshimba diobe dishya-ndjindji, mwanda yawa akulupil'eshimba die nyi mutshikame, anka awa atambuka na binangu akamanunwa. *Nkindji 28:26*. Efile Mukulu akalekiela milwisho yobe, ank'obe okalamate poo ku kululama, mwand'efuto dia bubi nyi ndufu; anka buntu bwa bisumanga bw'Efile Mukulu nyi muwa wa ikala-ika. *Loma 6:23*.

Binyibiabia anwe bakumine mwi'File Mukulu, nubapu kwipana kwi'File Mukulu, biabia kwatshilai ku kipaso kia binyibinyi, mu kukumina, na mu lusa lwi mwi Kidistu Yesu, mwand'anwe anukobesha kwakula mubakwidile mutumibwa Paul eshi: Mwand'ami namene nyimwiukie andji mukumine na kusumina'shi, euku kulama'kia kinamubikile ku diadi'efuku. *2 Temote 1:12*. Biabia anwe bakuminwe nwtamishe anwe banabene pa kukumina kwenu kunyingie bikata, na kuteka mu Kikudi-E-Selelee. biabia elamei mu lusa lw'Efile Mukulu. Nutale meso kwi Yesu Kilomboshi kia kukumina kwenu, mwanda Nfumwetu bakwile'shi: Ami uno nyi dinyi eshinda na binyibinyi na muwa. Binyibiabia Nfumwetu namene akafiki pa mwanda wa kwitutambula bu b'e namene, biabia atukekala ikala-ika na Nfumwetu. E, nyi Nfumu a banfumu, Mwanana a ba mwanana.

Binobino kwadi'e, euku kwitulama ku kukokola, na kwintutula ku mpala kwa ntumbo ye kushi kilema, na muloo ukilekile, kwi'File Mukulu umune'nka, bupenka bwe, Mupashi etu mu Yesu Kidistu Nfumu'etu, kwadi'e, kwikale ntumbo ikilekile, na kinemo, na butontshi, na matalwa kwibedi kwa mbangilo na ku binobino mpaa na kwikala-ika. Amen. *Yuda 24:25*.

Kibalo kibuwa ki'Efile
Bantu be bebuwa bekudi
Kibalo kia muloo ukata
Na mianda ibuwa y'Efile

Kibalo ki'Efile

Kia muloo na mianda ibuwa (Bis)

Patwanakafikie kw'Efile
Atukasepela bikata
Tatwa na kekale na malwa
Mu kibalo ki'Efile etu

Patwanakafikie kw'Efile
Twanakatumbishe Mupashi
Twanamusamune na ñono
Tukashale kwikala-ika.

Bandai kutala:

Dino ebuku namu nyi ndjifundwe mu ingi ndjimi, inyi ndjimi nyi ngi-
no: Mu Kisesuto, na mu Kizulu, na mu Kikosa, na mu Kishangana, na
mu Kinyanja, na mu Kiswahili, na mu Kiafrikaans, na mu Bangala, na
mu Kitswana, na mu Kivenda, na mu Kipedi, na mu Kisongé.

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de www.angp-hb.co.za ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialectos falados em todo o mundo, a saber: (África, Ásia, América do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuitamente a literatura evangelica, livros e folhetos em mais de 538 lnguas diferentes escreva para:

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

info@angp.co.za

A Gospel Literature Mission financed by donations

Une Mission de litterature evangelique finacee de dons

Missao de literatura Evangelica financiada por donativos

(Reg. No. 1961/001798/08)